

乾隆杭州府志

杭州府志卷九十一

人物 六 孝友

漢

孫鍾富春人性至孝種瓜為業嘗有三少年詣鍾獻瓜謂曰予司命也以君孝感于天故來耳遂指山曰此堪為墓鍾志之及卒葬焉墳上嘗有紫雲曼延數里人謂孫氏其興矣鍾即堅之先也

咸淳志

按舊志謂鍾卒子堅葬鍾子穴三國志孫堅傳不載鍾名寰字記謂堅所居其祖種瓜郡縣志謂堅其元孫則舊志稱堅子者非

晉

孫晷字文度富春人吳伏波將軍秀之曾孫恭孝清約學識有理義父母起居嘗饌雖諸兄親饋而晷不離左右富春車道既少動經山川父難于風波每行乘籃輿晷躬自扶持所詣之處于門外樹下藩屏之間隱息不令主人知之兄嘗篤疾經年晷侍藥石甘苦必經心目跋涉山川祈求懇至尚書張國明表薦晷公車特徵會卒時年三十八

晉書

本傳

暨遜字茂言餘杭人仕晉爲廣昌長封關內侯以孝行著聞咸康五年旌表門閭有碑在餘杭縣西

咸淳志

媽皓字完起吳郡餘杭人父昆南郡太守被劾入獄皓年十六髡頭詣闕通章不省皓不飲食懷石腰中往詣公卿及行路時輒出石置地叩頭流血覆面莫不傷懷遂奏理

昆罪

太平御覽

南北朝

徐雄錢塘徐文伯子雄亦傳家業尤工診察位奉朝請能清言事母孝謹母終毀瘠幾至自滅俄而兄亡扶杖臨喪撫膺一慟遂以哀卒

南史張融傳

朱謙之字處光錢塘人父昭之以學解稱于鄉里謙之年數歲所生母亡昭之假葬田側爲族人朱幼方燎火所焚

同產姊密語之謙之雖小便哀戚如持喪年長不婚娶永
明中手刃殺幼方詣獄自繫縣令申靈勗表上別駕孔稚
圭兼記室劉璡司徒左西掾張融牋與刺史豫章王曰禮
開報仇之典以申孝義之情法斷相殺之條以表權時之
制謙之揮刃酬冤既申私禮繫頸就獄又明公法今仍殺
之則成當世罪人宥而活之卽爲盛朝孝子殺一罪人未
足宏憲活一孝子實廣風德豫章王言之世祖嘉其義慮
相報復乃遣謙之隨曹虎西行將發幼方子惲于津陽門
伺殺謙之謙之之兄選之又刺殺惲有司以聞世祖曰此
皆義事不可問悉赦之選之字處林有志節顧歡見而異

之以女妻焉官至江夏王叅軍

南齊書本傳

杜栖字孟山錢塘人徵士京產子從儒士劉瓛受學名儒貴游多敬待之刺史豫章王聞其名辟議曹從事仍轉西曹佐竟陵王子良數致禮接國子祭酒何允治禮又重栖以爲學士掌婚冠儀以父老歸養栖肥白長壯及京產疾旬日間便皮骨自支京產亡水漿不入口七日晨夕不罷哭不食鹽菜每營買祭奠身自看視號泣不自持朔望節歲絕而復續吐血數升何點見栖歎曰卿風韻如此雖獲

嘉譽不永年矣卒年三十六

南齊書本傳

褚修錢塘人父仲都天監中歷官五經博士脩少傳父業

兼通孝經論語善尺牘初爲湘東王國侍郎稍遷輕車湘東府行參軍並兼國子助教武陵王爲揚州引爲宣惠參軍限內記室性至孝父喪毀瘠過禮因患冷氣及丁母憂水漿不入口二十三日每號慟嘔血遂以毀卒

梁書本傳

唐

何公弁餘杭人事親孝居喪哀慕誠切與方宗章成緬並

稱方宗亦餘杭人

舊志

章成緬於潛人喪母廬于墓手植松柏墳側生紫芝十三莖烏鵲來巢廩廡共處長吏以聞勅旌表門閭人稱爲章孝標家貧篤學仕爲山南東道從事

舊志

按何公弁章成緬見唐書孝友傳片

田彥升杭之仁和人時杭俗鄙食餅彥升家于半道紅幼性至孝其母嗜餅彥升慮隣比窺笑常遠市于蘇湖間熟之以布囊負歸俄而楊行密將田頔兵暴至鄉人皆竄避山谷糧道不接或多餒死獨彥升挈囊負母竟以餅免時人以爲純孝之報

傳肱
餅譜

宋

李瓊仁和人以鬻綰爲業事母孝夜嘗十餘起省母母喜食時新瓊百方求市得必十倍酬其值

宋史顧
忻傳

娶妻有子

移居母室母諭之曰汝年來筋力頗憊盍求婢以侍我瓊

曰凡母所欲不親經手意如有失耳市人知瓊之孝者物新出必先求以奉瓊淄川人張用聞其至孝因遷與隣居

續文獻

通考

蔡汝揆艮山門外太平鄉蔡塘東里人朝奉大夫通判瑞州母沈氏卒汝揆尚幼父霖用浮屠法火之汝揆以父澤入仕每傷無松楸之地言之輒泣刻木爲形衣衾棺槨擇地而葬仍置贍塋田建菴屋命僧守之鄉人呼爲木娘墓

咸淳

志

按蔡汝揆見咸淳志而舊志及仁和縣志俱載入明代省志仍列于宋今從之

孫長者伏其名富春人母病躬親藥物目不交睫衣不解帶及母死身已病將葬竟死臨終語諸子曰吾生不能送母于穴死歛吾以衰經庶盡吾孝于土中時皇祐間也子

式登進士第

兩浙名賢錄

毛存杭人父伯益坐流嶺表存跋涉數千里函骨歸人稱

篤孝

圖繪寶鑑

周雄字仲偉新城人事後母素謹賈于衢聞母病急破浪以出爲水所沒越日屍浮于江顯神于衢人感其孝奉爲

江神新城父老卽以其宅爲祠

徐士晉周孝子碑記

按雄歿後封周宣靈王詳祠廟卷中

周阿二鹽官人母俞氏病阿二與弟阿三各剗肝以療又

幼弟阿九通體鈎燈以禱病乃痊

成化舊志

盛立旺二子富陽人立旺妻病其長男剗肺次亦剗股邑

令程琚作詩揭其門嘉定癸酉六月旌表

成化舊志

葛小潤富陽人甫九歲母朱氏病剗股爲粥程琚爲令引

至前齒未齟也遂上其事于府嘉定癸酉九月旌表

萬厯舊志

朱應孫臨安人其母臥病且劇應孫號呼迫切醫禱弗痊

乃剗股肉作糜以療之母疾遂愈

嘉靖臨安縣志

咸淳丙寅五月

旌表

成化舊志

俞大成俞廷用俞亞佛皆臨安人亞佛年十一母病剗股

以進廷用與大成皆嘗刲股至亞佛凡三世云咸淳丁卯

旌表

萬歷舊志

陳茂祖居錦北鄉父德病久醫禱弗瘳乃刲股療之父病

遂愈後父歿哀毀骨立廬墓三載

嘉靖臨安縣志

咸淳丁卯旌表

成化

舊志

龔婆兒臨安民龔文子文病甚婆兒刲左股以愈其疾

嘉靖

臨安

咸淳戊辰旌表

成化舊志

梅來兒昌化農家子母病篤百藥罔效思劬勞之恩無以

報答乃刲股以進病遂愈

夢梁錄

咸淳戊辰十一月旌表

成化

舊

志

何氏子女富陽義安人母病女與幼弟割股和粥以進母

遂安

舊志

元

俞全杭州人幼被掠賣爲劉糕家奴後獲爲良自汴步歸

尋其母及姊得之事母以孝聞

元史羊仁傳

鄭萬戶至元間杭州人萬戶天性褊急不能有所容奉母
備極孝道母誕日垂至預市文繡毯段製袍爲壽鍼工持
歸縫綴旣成爲油所汚時估貴重工莫肯賣自經不死隣
婦有識其母者潛送入白之至日母臥不起子至候問安
否曰昨暮偶視新袍几上油缶濺漬成玷我情思殊不佳

耳子告曰一袍壞複製一袍可也母遂起人咸以此爲賢

母而益見萬戶之孝

輟耕錄

陳斗龍字南仲昌化人父澤民母盛病死斗龍處喪哀毀廬墓有羣雁集其上飛鳴三日夜後娶有告者曰若母王氏產若未一歲歸錢塘問其家在清湖中斗龍大驚且哭卽日與婦訣曰必與母俱歸初澤民以妻無子如錢塘求宜子者得王氏生斗龍未周期滿遂去斗龍至清湖訪其母家涉二三十年因無在者逢白髮媼告曰若母歸江東斗龍卽入江東又濟江踰淮走饒徽廣德寧國凡六年于永豐縣禮賢鎮得焉母爲施氏婦老矣施氏因其母無子

女以母還之斗龍奉母歸其歲夏四月徽盜作溢出昌化境斗龍爲廬百丈山身自奉母婦擁後未至路逢盜數百人斗龍稽首曰壯士斗龍幼不知母聞母在江東行求六年始得母歸未百十日卽相遭于此斗龍夫婦當死母老誰與奉母者盜憐其孝相約遣去且戒勿更至此山驚母傷孝子心里中人亦賴以免

胡長儒撰
陳斗龍傳

潘生富陽人幼喪父與兩弟奉母大德間江南大饑自度曰吾終無以給母則母子俱死卽以母屬兩弟自備回鶻人乃告母曰兒當傭錢塘數月得錢米活家母勿憂旣回鶻人轉賣遼東軍戶遣代戍虎北口曾有詔江淮子女流

徙者悉還鄉土遂從遼東還道過一女子鵲髮尾行問之
則曰淮產也君南人幸挾我同歸于是日卽操瓢道乞夜
泊茆葦中曾無一語及亂渡淮送女到莊女上堂見父母
攬涕相抱持詰門外同來者卽引生更衣具酒執瓊跪曰
吾女幸完骨月君去家父母不知存亡歲丁游饑雖有兄
弟亦恐不能存活吾女實君箕帚妾也君必無歸生毅然
曰吾母固衰耄度尚可活今遂不歸是吾遽死吾母也遂
歸母死已三載兩弟亦死生追服制食其故技于鄉以終

吳萊撰
潘生傳

周德驥字仲良新城人父早世事母備至起居飲食唯母

意是適依戀若嬰兒然母病營救弗效夜輒向天而禱願
減已壽以益母壽一夕見有神人手執蓮花告曰不必爾
也誦法華經六十部爾母差矣德驥用神言持誦唯謹至
正之季隱桐廬山谷中子昉亦以行誼著

徐一夔撰
周德驥傳

按周德驥卽舊志周驥今從通志改正

鮑完澤字信卿資性粹敏涉獵經史過目輒不忘至順初
翰林冠學士嘗遊其門因以信卿學行薦于朝信卿以奉
母辭至正中江浙寶格叅政及浙西部使者爭辟用之誓
以母老不就人皆稱爲篤行君子

舊志

按鮑完澤字信卿舊志誤以字爲名今更正

明

鄭璧字伯規仁和人讀書好古詩文清雅事親孝父歿方殮鄰不戒火幾延居室壁被髮稽顙額天號泣身捍父柩天爲返風息火竟得保全人共訝之居喪三年不御酒肉母歿亦如之父友陸璘家貧無子父嘗許以葬地後璘亡璧購地以葬曰無使先人食言地下翰林張益爲鄭孝子

傳

嘉靖仁
和縣志

姚文杭州前衛左所軍早喪父事母盡孝身隸戎伍每晨出趨役必拜母而往暮還如之母卒擇葬玉泉山詰旦有虎聚其地相跑成穴遂葬焉其孝感如此

兩浙名
賢錄

馬純字叔良其先西域人元末父景華避亂居錢塘遂爲錢塘人純弱冠父景華沒一慟輒頓絕父臨終時屬純曰我葬後當十日一省墓純如期必往哀哭奉母復備至母疾徬徨營救形爲枯瘁母歿號泣勺水不入口者三日旣葬構一菴墓傍居三年作哭母詩懷母賦以寫其哀鄉人

誦之咸稱爲馬孝子

陳贊馬孝子傳

何良字永年富陽坊郭人年十四母疾刲股以進父病露禱于天乞以身代父嗜鱸魚臨終思之歿後臨祭所居後有鱸躍于岸取以供祭又夢母思鹿肉入山適有鹿馴伏就縛載歸以祭人謂孝感所致

成化舊志

孫濂餘杭人性孝友弟淳廩生家貧濂爲經衣食又聞紹

興王龍溪錢緒山二先生講學天泉俾之師事焉

餘杭縣志

楊壽字愷之錢塘人天順丁丑進士終廣西右叅政天性

至孝奉養必時親食始食父喪哀毀骨立二兄相繼歿撫

其遺孤如己子

舊志

何訥字養仁富陽坊郭人事父永年母鍾氏甚孝或他出

雖雨雪必歸父歿負土成墳結廬墳傍以居終制之日羣

鳥飛繞墳所成化三年旌表

成化舊志

按何訥舊志作納養仁作養人今從省志改正

董謙有孝行親喪廬墓成化中表其閭

嘉靖海寧縣志

陳璋字廷章仁和人早遊郡庠以貢入太學天性純孝不以貧故儉甘脆之供父老癱臥便溺數下璋晝夜不離側衣不解帶假寐以須父欲興卽扶掖頸不授枕者十餘年

父母沒竭力營殯絞衾棺槨哭泣踴踊俱如禮

兩浙名賢錄

潘鶴齡歲貢生性孝喪母廬墓日夜悲號虎狼過其廬不

敢近

於潛縣志

金洪馨如里人事母盡孝嘗割胸肉愈母疾及沒刻木像工人以血料塗塑洪曰奈何以猪血汚母身刺胸取血盈盂周塗其像朝夕奉侍如生時又體母意養貧女弟割產中分之成化末奏聞

萬歷錢塘縣志

馮真儒於潛人性篤孝父母喪廬墓六載

舊志

方模字廷瑞新城人幼篤孝父卒于官訃至卽徒跣奔赴

事繼母克孝養性高朗好義樂施予邑里式之

新城縣志

孫經農家子也父早沒與弟緯躬耕養母母有奇疾非藥餌能療但思食一物隨得隨起稍遲卽劇二子竭力營辦備諸品以俟一日疾作思蝦羹二子卽輟田事徧求諸市中不得正跼踖忽于水際見水動二子競解衣入水求之得巨蝦數尾急調羹以進母病遂已

寧志備考

王葵字士忠杭州右衛人博觀羣籍力于孝弟旦夕羞養必躬親出必告所歸必詣膝下肅揖親常怡色則喜否卽

懼戒家人無敢出聲伯兄歲行役葵治家不備一私錢母
憐之與五金營兒女費暨父母亡伯兄求析居業已均產
葵顧妻取篋中七十五金來仍兩均之兄問安所得金曰
是某年月日阿母與吾五金營兒女費者也吾息之幾年
得此義當與兄共其出納具有時日不爽云

萬歷舊志

孫宗黻字仲文錢塘人六歲喪父與寡母相倚爲命及長
益竭誠奉母母疾衣不弛帶以待湯藥母終哀毀晝夜不
輟居喪三年廬于墓側旣免喪猶日操一舟攜一飯一蔬
至墓所展哭墓之左右有以墓地求售者宗黻慨然曰吾
欲廣吾親墓而使若親無葬地可乎厚加稱貸而謝之地

得不售人謂孫孝子于是乎能錫類矣及年逾八十病將
革猶扶掖至母旌節坊下稽首以示終身不忘母氏云

兩浙

名賢錄

翁浩字世宏事父母至篤出必告反必面既沒告于祠堂
至老如一日嘗入京師在舟中反側不能寐少寐輒見母
病狀驚寤遂歸母果感疾當與伯兄仲子析貲時有故往
吳郡還書誠子曰吾誠恥是爾無取均焉子奉教祇取一
二麤敝者與宗姻處至老無纖毫介蒂

萬歷錢塘縣志

孟春居芝松里年二十九以貧出傭得錢供母成化中鄰
火延燎迫其居母臥不覺春聞以歸不顧烟焰入負母或

止之不聽遂與母俱焚死萬歷中湖墅大火諸生李中華自外歸火已及父尚在屋內與弟入覓之再三不得父子

三人俱焚死事與春同

萬歷錢塘縣志

章釧別號淡塘海寧人生成化之乙酉終穆宗朝壽一百有三性至孝學行端凝當路器之欲以經術薦用時母登

上壽釧上書辭辟以終母養

舊浙江通志

王錦錢塘人性至孝二親寢疾湯藥必先嘗及卒哀毀骨

立克稱仁孝

舊志

潘茂海寧人庶生子也事嫡母盡敬貧而奉甘旨極其周

備

海寧縣志

凌立錢塘人少孤事母以孝聞登嘉靖進士官比部遷建武太守多惠政爲僚黨所忌罷歸奉母色養備至老而彌篤母歿哀痛骨立數月竟卒人謂終身之慕立無媿云

兩浙

名賢錄

高鉉字成之臨安人天性孝友父時官給事中以抗疏劾嚴嵩繫獄鉉甫弱冠血表伏闕訟寃嵩懼密賄官守擊殺之

臨安縣志

凌貴字克和年十二父謝世侍寡母以居母羅暴疾羣醫罔治割股和藥以進乃愈嘉靖甲辰歲大歉郡人競以黑菽濟饑貴曰此非所以養高年也力營精膳以進而已與

妻子則甘糲食邑大夫以敦孝表于門

嘉靖仁
和縣志

江圻字子望仁和人曉之子隆慶戊辰進士授南京刑部主事陞郎中擢廣西提學僉事性純孝父母病衣不解帶行不正履居父喪泣血三年食淡茹素不入燕室每過內目俯不一視婦過亦如之

仁和
縣志

褚偵字本中錢塘人性至孝稍長喪母既葬喪父哀痛幾不能生母歿之歲有嘉木二茁于所居牆上枝葉類椅桐偵移植于所居之傍十閱寒暑二木劍拔而上父歿嘗與二弟徘徊樹下有風颯然起于木末俄而怒號樹欲仆偵曰古人有欲養而親不逮者以風木爲喻因相向大慟遂

名二木處曰風木之軒

徐一夔風木軒記

黃棠字子重錢塘人性孝友母病醫藥必親嘗禱祀額天
可以身代不得哀毀至骨如柴棺歛喪祭之具不以貧故
有缺居喪三年如一日懼傷父心朝夕率子婦上食問寢
七年父亦歿時屬儉歲資用不給拮据營厝必如禮乃止

舊錢塘

縣志

虞舜卿字國賓篤于孝友代兄漕濱死不怨酬以腴田轉
授諸姪一日哭父墓聞空中語曰有虎甫下山而塚有蹠
迹矣夜奔視母疾有雙燈自移引路人皆以爲孝感

萬歷錢塘

縣志

葉文榮海寧所軍季弟文龍殺人坐法其母愛弟涕泣不食文榮謂母曰弟年尚少我長矣又有子請代弟詣官服殺人罪竟坐法

舊志

董嗣昌海寧人兄嗣晉弟嗣昱並邑諸生大父樹父成身世以孝友聞嗣晉兄弟三人飭躬厲行期不負祖父之訓萬歷己丑歲荒五月疫作父及繼母蔡皆沉疴三子侍疾唯謹越七日母亡殮訖三子事父憂勞益力越三日嗣晉卒又踰數日嗣昱亦卒嗣昌以母兄之痛方殷弟喪之殮更亟時父病轉劇乃割股和藥以進父服之得甦乃罄資具喪殮辦薪水贍幼弟妹入則和顏慰父出則泣血眼枯

越五日亦卒里人上其事于督學使者旌其閭曰一門三

孝

海寧三孝子傳

孫敬美字孝先餘杭人性純孝事父母柔色承顏終身如

一日

舊志

陳三恕字華甫餘杭人四世同居終不異爨以孝友著

餘杭

縣志

方烈昌化人性朴茂嘗刲股救療親病居喪侍養咸以禮

著

昌化縣志

徐子夔字九珍昌化人以邑學生入太學官至岷藩長史性至孝父母病憂形于色父歿哀毀盡禮生母早喪奉嫡

母色養無少違母亡泣血三年不入燕室

舊志

胡化字德甫胡陳里人父病夜禱于天割股以進而病愈再病亦如之家人終無知者已而父卒哀毀過禮兄弟析產則讓膏腴而取磽瘠浙西羣盜起相戒毋入胡孝子里

海寧

縣志

朱暹餘杭人父故與弟昌事母至孝家雖貧母欲之物必多方致之以悅其心母病失明求醫莫治與弟晨起盥漱祝天含水舐之月餘母目漸爽逾年復明杭俗春時四方多來湖山其母亦欲往暹不能倩輿與昌以竹椅舁往各寺每歲率以爲常母年九十終家漸豐裕蓋天所以報孝

子也

七修類稿

褚文奎母徐氏疾篤藥石不效奎割左股作羹進母立愈

舊

志

沈孝子沙村人其名不傳萬歷中山水暴漲高至丈餘漂廬舍母沒入水孝子號慟躍入洪波中求母明日于瓶窖鎮逆流上三十里還至沙村母子俱死里人駭異收葬之

至今沙村有沈孝子墓

舊志

胡文奎餘杭人少失父奉母甚孝萬歷戊午七月十五夜雷雨交作山水突至文奎亟負母避難呼婦挈兒急起方離床床卽浮甫出屋屋隨漂折正惶遽間見堆阜有桑株

卽奉母緣置其上是時婦提幼子呼救奎曰我但能救母不能救若等矣婦子皆溺死而母獲免于難

舊餘杭縣志

何倫字士明錢塘人父病不解衣侍湯藥者五閱月及卒哭踊不欲生及葬躬負土成墳晨夕攀栢而號哀感行路以母病弗克廬墓歲大祲與妻子雜採湖中菱芡共米菽而飯三時上食列簋如故其母不知爲祲歲也蓋甘倫之養者三十年乃終而倫亦白首矣

兩浙名賢錄

按何倫舊志誤作綸今從省志改正

袁用字廷用新城人性孝友與仲弟璉同居爨歷三世友

愛無間

舊浙江通志

陳九臯臨安人母故痛哭幾殞父邁疾籲天祈代割股救

愈

舊浙江通志

金震母沈氏有疾割股二次獲痊事聞撫按給扁

臨安縣志

俞爾奎臨安人年十四兵至爾奎匿複壁中聞父被執急

趨出願代父死兵遂殺爾奎而留其父

舊志

郭金科錢塘人萬歷甲寅夜火焚其廬金科年十五已脫

于火不見母遂慟哭入火救母隣人止之不得烟燄障塞

竟焚死明晨出屍煨燼中子母相抱不解權關楊師孔題

曰郭孝童御史聞之命葬之孤山表曰郭孝童墓

明史孝友傳

何應達號雲臺天性孝友奉親備極豐腆而儉薄自甘父

歿哀痛號泣見者多爲出涕兩姊無嗣皆爲之營葬伯兄

喪子鞠其孤孫撫兩弟教誨婚娶之晚年閉門以書史自

娛卒年七十五

舊志

陸東字宗望仁和人三中副榜不第遂入國學天性孝愛

長兄歿燕邸親往扶櫬嫂嚴病瞽而弟婦少寡悉敬養之

終其身兄弟皆有子俱天悉殮葬如已出又爲兩嫂連舉

大喪動皆循禮子運昌舉進士

舊志

徐文斗慶餘子隨父官珙城時流寇掠城邑慶餘被執文

斗請以身代賊並殺之

新城縣志

按舊志亦載此事作羅鈞未詳孰是

姚自虞字象梅由鹽官徙錢塘以親年老奉養不離左右者數十年天啟間杭火延燒數十里值自虞埽墓歸倉惶不辨門徑冒走烈火中髮盡焦爛奉父母從他竄出天忽反風自虞屋宇獨存中丞旌其門曰孝感

陳廷會姚孝子傳

孫峻卿新城人性至孝母疾割股以進疾遂愈兄歿遺孤

甫六歲撫之如已子

浙江通志

陳軒富陽人天性孝友讀書習禮少承家訓有古人風

舊志

郭永範號型伯海寧人性質直孝友律身極嚴非孝弟不

言非仁義不行里中稱爲獨行君子

舊志

鍾鴻頴海寧人早失恃事繼母至孝父卒所遺產悉讓與

弟空居壁立不顧鄉黨稱其孝友焉

舊海寧縣志

張邦彥海寧人事寡母溫清定省無失節數十年如一日

舊

志

張文禮字行之母病革糜股以進復延二十年

舊志

屠應昌富陽人性至孝親有疾割股以療及歿後廬墓朝

夕哀思若將終身焉

富陽縣志

何蘭旌字湘來錢塘人早孤祖母與母撫之成立祖母年

八十餘蘭旌孝養不懈疾革哀號頓地絕而復蘇母病侍

湯藥晝夜不解帶目盡腫葬值隆冬衰絰徒跣冒霜雪行

百里足凍指墮遂成瘡疾每念生不獲養親凡歲時不受

子孫拜賀斷諸滋味崇正辛巳歲大饑給糜粥施藥餌全活甚衆少爲名諸生經史百家靡不通貫尤精于易言方行矩爲鄉里所矜式學者稱江澣先生

應揭謙撰何蘭旌墓誌

孫起觀少有至性父廷楫爲宗人所忌值伯兄與從兄忿爭從兄邂逅身死并訟及廷楫竟坐論死時起觀年尚幼往來赴訴多中夜間行艱苦百出一日夜行遇虎暗中相觸迫視之虎也竟弭耳去人以爲孝感後廷楫終得昭雪閭里咸稱爲孝子之力云

富陽縣志

駱繩先臨安人聞寇警祖母陳年八十矣不能行屬繩先速避去繩先涕淚交頤卒不去寇至俱被殺

舊浙江通志

方椿新城人事母極孝定省不缺侍疾湯藥必親嘗補庠

生卽以母節鳴于當道得賜旌表

舊志

潘鶉新城人善事繼母垂老孺慕

新城縣志

郎祥之於潛人親亡廬墓

於潛縣志

盛伋臨安人孝友家居義方訓子壽至九十而卒

舊志

柴世堯字雲倩仁和人四齡傷母事後母孝父紹勲宦遊

獨家居奉祖弱冠中鄉舉及會試得父手書言病心動流

涕棄試奔赴而父已卒扶櫬歸里服闋後母在堂曰吾寧

以三公易一日耶方伯朱本賢疏薦詔下特徵力請終養

不赴

舊浙江通志

柴世基字式穀祥曾孫天啟辛酉入北雍中式謁選得合
肥教諭以勸學興賢獎勵寒畯爲事後移平湖俸入必以
奉父有知人鑒識鄭尚友于隴上救倪生于獄中其所識
拔多類此

仁和縣志

徐周官字又旦母病劇嘗湯藥侍床褥晝夜不離者數月
百計醫禱請以身代及歿哀毀幾不能生事父尤色養曲
意承順能得歡心鮮兄弟友愛諸姊甚篤族人國課不能
償悉周官代輸歲以爲常貧不能葬及無後者爲維持經
紀咸黨中貧乏者周卹備至賴以舉火者數十家

錢塘縣志

祝匡文字光升貧甚兄巨文卒遺孤四匡文獨力爲人傭

耕以給家食崇正辛未歲縣大歉匡文必先飯孤兒自採
橡藿咽之得不死

海寧縣志

傅齡發字長舍弟齡熙字長穆並儀部巖子巖遇難刃將
及齡熙時年十四以身蔽翼其父刃著于頰而死齡發起
救矢透左腋而仆少頃復甦見父弟死慟曰吾一家可謂
無負國恩矣遂以手抉其創創裂而死時三屍皆枕深草
中三日巖妻姜與其長兄齡文始克殮荒山無人僅收其
骨遂各以墨志其髀股匣之以歸後二十年始克葬皆有
文名與其伯兄號三俊俱殉父兄之難節烈孝友出于一

門

錢塘縣志

俞可章臨安貢生生二子爾晉爾鼎明末父子爲寇所執
可章賂以金贖子死二子跪泣求留父父子三人抱泣爭
死寇盡殺之

臨安縣志

俞守正臨安人年甫十三寇至同父一觀被執寇殺一觀
見守正爲童子欲挾之去守正曰父死子義不獨生遂并

殺之

舊臨安縣志

俞爾濱臨安諸生可鉅子少事繼母至孝寇至母方氏閉
門經死爾濱繞母屍而哭亦爲寇所害

臨安縣志

陳天麟字天石富陽貢生父二曜以貢赴禮部崇正初流
賊充塞道路梗斷除夕家人酌椒酒相賀天麟謂兩弟曰

汝何賀乎言已淚潸潸下元旦卽別家人策蹇驢北上遍歷齊魯間無所遇忽經一村落聞後有聲呼已名者回視之卽父也遂偕歸人謂孝感所致云

富陽縣志

汪海臨安人父志以後府都事隨安遠侯柳升出屯志時押餉柳喪師闔部治罪海赴闕爲志申辨復職

臨安縣志

胡文燦字國華號侍溪錢塘人世居芝松里祖禎世父賢並以孝義稱父良仕應天經歷文燦幼刲股療母護產諸弟嘗與兄弟輩醵金賑饑完婚助葬鄉黨德之文燦官經歷贈光祿署正外孫大學士黃機表其墓

錢塘縣志

徐介字孝先仁和人明諸生家塘栖之落瓜世稱落瓜徐

氏父灝早卒事後母以孝聞

家傳

胡安國臨安諸生家貧甚父存義歿于京安國方髫年聞

訃大慟隻身至京負父骸骨歸

臨安縣志

徐允選臨安諸生父病篤百藥無效允選焚香告天割股

飲之竟愈

舊臨安縣志

王均字以中錢塘人年十五祖母病劇均割股和羹以進

父道焜殉國難均散髮長號尋亦卒

錢塘縣志

朱稷字南圖崇禎庚辰進士先世自新安遷仁和父仁爲

吏以他吏牽連被逮稷年十四日夜泣欲代父受罪族有

侍御某者與巡浙御史善稷欲以文求見不可得侍御書

寢夢一小童以所業進兼有所訴視其衣則敗絮蒙蒙然
既覺以諭聞者有其人介以入稷遂得見侍御讀其文奇
之爲白其父寃父卒母持議未殮時娶婦稷不可婦已至
門稷泣寢柩側既葬廬于墓服除乃婚

吳農祥
就正稿

國朝

郭氏三孝子仲和仁和有宋賜祖墓在靈隱寺西土豪
曹氏佔之父渠南忿鬱成疾仲和走都叩闕曹懼至清河
擠之水中死子府年十二剖股肉以救祖鄰家火府負病
母冒焰踰牆出府病子嗣汾日夜禱忽空中云增孝子父
壽一紀府夢神以紅丸納其口遂愈嗣汾距渠南四世矣

嗣汾克復其土豪所奪之墓

浙江通志

楊猷字乘六杭州府學生性至孝乙酉之變兵及母頸猷

號泣請以身代兩釋之以子雍建貴贈貴州巡撫

海寧縣志

周之官字待玉世居仁和兄弟五人皆友愛不析產之官

好施與前明庚辰省會大禮之官出家資賑粥活者數千

人子七人同爨四十年杭城孝友家風數棣萼堂周氏

浙江

通志

虞鈐字峻民錢塘諸生少孤事母至孝家貧以教授供母

務得歡心母病危醫藥不效鈐潛割胸肉雜湯以進病遂

愈當割時血流暈仆地得不死人以爲孝感後母以天年

終斂廬于墓側遇大雷電必出廬立墓旁曰兒在此毋
畏終制晨赴館暮必反于廬雖友朋文會大雨雪固止不
從一夕迷失道陷大澤中昏黑不辨有光前導守墳人持
燈趨救乃得出廬前生連理木三青葱可愛斂躬耕自給
不辭胼胝毅然以道爲己任志在明經敦五倫沈子增問
何所長曰吾年已長大而尚有童心血氣雖衰而不敢自
暇逸其好學不怠如此年六十一終無子至今春秋諱曰
諸弟子咸會墓上享祀惟謹

舊仁和縣志

按省志斂列儒林今詳其行事稱孝者獨多因載入孝
友門茲見扶植倫常端資嚮行也

徐聯芳字君錫侍筠子母病刲股禱以已年益母壽夢神
許之越十餘載母卒喪葬盡禮與兄弟分財能有讓崇禎
末避亂江東有母女爲寇所掠者贖之其母請納女爲妾
拒之

舊志

方羽脩新城諸生父病癰隨侍不一刻離病旣篤籲天以
身代及卒廬墓三年

新城縣志

張渭芳錢塘人年十七母沈病篤祝天割股遂瘥後復發
欲一見媳媳江氏女也入門年甫十六知前者以割股瘥
亦割股割及骨而仆小姑驚呼江亟起掩其口陰以股肉
煮藥進姑亦愈其時同邑張芝夢與妻楊侍老父病衣不

解帶者經年亦先後割股求代父病以謬巡按王元曦額

表其門

浙江通志

陳常字昭夏居錢塘敦孝友兄客閩中兵梗不得歸母思之飲泣目漸昏常乃擔囊走數郡宿處遇虎幸免卒得會

兄于閩之南靖兄已成悻疾奉以歸母憂得釋

溫廷鈞陳孝子傳

仲恒字道久錢塘人父敬則以文行著于鄉恒九歲能文

長負氣節事母金少不懌卽長跪俟顏霽始起伯兄鼎遭

謗下獄恒未弱冠變服爲傭保營救得釋居常泊如與其

婦鍾校簪卷帙或累月不出庭戶于書無所不讀學者稱

雪亭先生婦鍾忠惠公化民女孫名筠以賢孝聞

錢塘縣志

錢彥雋字聖楨錢塘人幼卽潛心經史嘗赴越省祖墓遂
應試爲山陰諸生天性孝友執喪旦夕不離苦塊隣火夜
發倉皇不可救衰經跪烈焰中呼號欲殉按察使于準急
率役昇柩出之得全

錢塘縣志

許孝恭錢塘人讀書尚氣節

國朝定鼎邑令顧咸建以節死孝恭爲請于貝勒殮而歸之母
病刲股母歿以泣血瞽妻盧亦孝與孝恭並祀旌德祠

錢塘

縣志

葛念字思善餘杭人性孝勇父邦以輸糧卒不知其死所
念固欲往覓衆以其幼也止之旣長親友勸之娶泣曰父

棺未歸葬何娶爲徒步千里外經三載始得其處撫棺一
慟負骸歸初倭寇沿途焚掠令甲三丁抽一念兄弟三人
念遂往從同知屈某至皂林猝遇伏軍兵潰敗屈自分必
死念從亂列中負之突圍而出屈遂免旣負骸歸生產日
落或曰屈司馬感爾德往必報焉念笑曰葛思善豈望報
者終不一往

餘杭縣志

朱子元仁和人母病臥十餘年跪而飲食之兄嫂遇之嚴
曲意以從不敢一言忤兄老而貧子元敬養備至

仁和縣志

錢瓚字仲瑟錢塘人父九臯卒于官瓚八歲哭泣如成人
母病禱代之死母頓愈瓚事伯父如父幼弟怠于學泣而

責之曰汝不力學何以慰老母乎弟卒有成

錢塘縣志

任二琦字瑞菴本姓韓忠獻公後裔扈蹕而南遂家于杭
先世授神術數傳至二琦益精凡醫嬰兒藥濡口卽瘥爲
杭郡增生殫心經史孝經春秋深得奧旨天性純孝十歲
喪母終身茹素父患疾不離左右居喪盡禮每風雨輒赴
厝屋悲號涕泣遠近求醫見貧窶不能具藥餌者出貲與
之人感其德多欲肖像以祀他如捐修文廟建造橋梁育
嬰掩骼諸事指不勝紀值隣火屋廬幾燬忽反風斯滅如
有神助人咸謂孝義所致云康熙中祀鄉賢祠長子允謙
性至孝父棺在室適遇隣火衰絰慟哭率僕從赴烈焰中

扶昇而出竟免於災次懋謙於書無所不窺考據精詳西
冷倡梅社推懋謙爲祭酒事親至孝父病疽以口吮之割

臂肉雜糜以進康熙己酉以貢入國子監

任氏家傳

陸寅字冠周錢塘人圻子年十六圻以牽連繫獄寅從入
侍奉尋得釋圻遂棄家遠遊不知所之寅上侍病母下撫
弱弟克殫心力母歿後有傳圻在武當山卽日徒步直趨
武當求之無所過去之他省涉歷險阻十餘年不歸然竟
不可得寅善文學尤長於詩康熙丁卯舉順天鄉試明年
成進士以哀慕勞瘁踰年咯血死

浙江通志

楊庭隆字文伯府學諸生性至孝重然諾每忌辰必慟泣

以祭年八十猶然故人有緩急必竭力周旋之

舊志

童金焰於潛人父病禱以身代果差弟早歿撫遺孤如己
出性好施予崇正間歲饑輸粟五百石邑中橋梁渡口凡
所修建者三費皆不下數百金行人便之

浙江通志

顧大觀字維垣其先上虞人徙錢塘年十二父恒宇客死
粵中大觀走粵扶柩歸過彭口經小孤颶作舟幾覆大觀
伏柩哀號颶忽止舟中人額手曰吾等幸免魚腹賴此孝
童耳于是人咸目爲顧孝童年十六祖病疽殷床褥間澣
滌拂拭不稍怠及沒號慟如喪父事母陳盡孝與弟友愛
無間年六十猶同爨宗姓無親疎悉敦和睦或嫠而能守

孤無依者悉養諸家乙酉亂兵掠子女流離道上傾囊贖之還其父母子六人次豹文貴封侍御大觀崇祀鄉賢

鄉賢

留祀冊

傅國璚仁和人母病與妻周氏同割股療之

舊志

呂蘭字谷芳仁和人少失怙年二十六家貧未娶與母蔡氏相依爲命喜作詩以嘔血死母益困蘭素與毛人慶友善一日人慶疾忽作蘭語曰我谷芳也予生不能養母今雖死魂魄猶依母側我母不食二日矣從公乞升斗以給吾母人慶家亦負持錢二百文以餽其母聞者泣下

舊浙江通志

應尚倫字里喬仁和人年十一失怙念未得逮養茹素者四十餘年娶婦張氏一語忤母尚倫怒必偕跪母前得笑乃起自是婦姑更相愛母中瘋遍求良醫治之三日而起已失音手足不舉如是者七年歲募人市藥廣中以療之居近錢塘江見渡者衆冬施薑夏施茗夜施火炬有溺死者則施槥子搗謙別有傳

舊志

陸之衡富陽人幼失母事父隆及繼母王氏甚孝繼母有子愛之分業自取瘠者周急里黨賴以舉火者數十家子遵道郡庠生爲人恬淡有遠志父母相繼臥病與妻何氏共侍湯藥體不解衣及居喪哀毀逾節父遺悉以濟鄉里

之貧乏者

富陽縣志

王兆京仁和人家素封有兩兄盡以家資讓之明末賊縛其兄子去兆京已無資爲贖走賊巢求代賊取火灼其體無完膚幸而不死嘗道拾遺金坐俟失者至還之御史表

其廬

浙江通志

金煜然富陽人九歲奉母入鄉避寇猝與遇煜然跪泣請勿傷母寇驚曰童子有此孝心反示以避處母患癰吮之而愈父歿廬墓三年登鄉薦以母老不會試雍正十一年

旌表

大清一統志

李士麟字孝則海寧人二歲而孤母胡撫之成立母危疾

禱以身代尋愈嘗建家祠置祭田修譜牒宗族之事無勿

舉丁母喪哀毀骨立知縣許三禮表其門

海寧縣志

許佐衡海寧人母病急刲股進之愈兄弟三人佐衡與兄承衡以遺產數十畝讓幼弟鄉里舉其事聞于邑令令旌

其門

海寧縣志

丁大綬字步玉仁和人五歲喪母後母鄭生子錫與俱就塾以弟幼掖之行雨則傾其蓋以覆弟及婦卒悉以所遺簪珥爲弟娶弟病亟目視兩子者再大綬曰汝子吾子也敢有二視耶呼已子與姪俱前長景儀次澎次景鴻次濬曰汝輩當如一父之子故景儀兄弟出入起居無勿同者

浙江通志 所著有家訓輯畧行世 鄉賢留祀冊

諸元振字以默錢塘處士性至孝年二十遭父喪三十六而妻死竟不復娶事母三十七年未嘗去左右母語人曰是兒五十餘髮頽白矣乃戀我如五六歲者崇正間歲大禮民饑死相藉元振家故貧創爲粥覺苑寺以食餓夫瘞族人死者一十六匱又上救荒三策監察御史從之全活甚衆年五十七卒里人私謚孝節 縣書亭集

嚴士堪字巨甫仁和人貨殖供父甘旨每飯手調羹以進昆弟食指頗繁三十年不析箸姪于鐵乙酉避兵暴亡撫其婆孤生平仗信義周卹貧乏傾囊不惜也歿之日親黨

哀之舊志

吳嵩齡字與九仁和人父允焯順治初知壽寧縣與妻瞿同死寇難時嵩齡尚幼縣諸生葉同匿之得免及官兵獲寇嵩齡遇之舟中痛憤持梃擊寇舟人咸爲感動後具衣冠葬父母丁家山廬于墓側晨夕攀號積成心疾旣長以能詩遊京師爲名流所器重久之歸里仍棲丙舍疾發而

終

浙江通志

燕士俊錢塘人乙酉間江南敗兵入浙士俊奉母避梁渚母驚憂成疾翦股和藥進之得痊母卒哀毀殊甚蔬布終其身祖志學以醫名士俊傳其秘多奇效

浙江通志

陸承祺承祚仁和陸夢蘭之子夢蘭客死鬱林時方軍興家酷貧二子拜辭其母筑筑走萬里乞食得至鬱林刺血滴骸閱十餘棺忽遇父故人殯棺在蕭寺二子撫棺一慟皆絕久之承祚甦而承祺死矣承祚子身匱兩骸擔以歸母以夢蘭棺旣得絕粒六日而死承祺祀學宮

仁和縣志

洪宗濂字昉叔仁和人六歲喪父家甚貧母汪撫之成立比長爲人會計以所得歸奉母年逾三十而不能娶母患痢百藥罔效宗濂冒雨走三十餘里詣東嶽祠禱以身代不數日母病愈宗濂果卒

舊浙江通志

謝勛於潛人山賊猝至勛與妻子曰吾爲母不暇計若等

矣負母逃得免

浙江通志

孫鳳珪餘杭庠生順治己亥父膺歲薦入京鳳珪隨侍扶掖返至淮揚父卒于舟海冠蒼黃不可得棺也鳳珪號泣呼天遇老人指示購以殮渡江歸負土築墳手植松柏廬于其側兄之泓家失火臥樓不能下鳳珪冒焰越牆而上

掖兄以出

浙江通志

吳伯祚字荆遠餘杭人父病亟割股勿效號痛欲絕既葬廬于墓長子維城成進士伯祚以父不及見猶時作孺子

泣也

舊志

章金榜昌化人母病割左股以進而愈

舊志

許金綬臨安人幼孤孝事其母母歿廬墓養葬兄嫂爲諸從子娶婦不惜貲財自奉至儉朱嘗見金綬一日衣綵

舊志

張殷甫字伯雨仁和諸生隨父之宣平任父病地僻無醫

殷甫割股以進獲痊

舊志

許彩昌化人少孤母鄭爲山賊掠去時彩年七歲稍長日夜思其母或告曰已隨某兵至都門矣彩乞食至都徧訪不得或告以母在陝西西安彩卽走西安母乃爲富豪紡

績號泣求見富家憐而遣之歸

昌化縣志

徐偉章仁和人以孝稱後臥病其子乃割股以療之病遂

愈後其子病孫艱亦割股救父得痊人稱徐氏世孝云

浙江

通志

沈筠字開平仁和人。有雋才。嗜學。敦內行。嘗割股肉和藥以療父。父病頓瘳。既而母病。亦如之。康熙己未。成進士。改庶常。會有以博學鴻詞薦者。試入高等。授翰林院編修。未

久卒。所著有斗虹集八卷。

浙江通志

陳之閏字始升。海寧貢生。幼喪父。哀毀盡禮。奉母避盜。盜掖之入巢。委曲勸諭。盜竟解散。每歲歉。首煮粥以賑。與人交有終始。遇失言。愆義輒面折之。

舊志

范驥字文園。海寧人。親病。思蛤入水取之。風雨驟至。乘電光出沒水中。卒取斗餘。以供甘旨。母病篤。艱食減。孫乳以

反哺時呼范孝子嘗募邑中富戶米三千石煮粥賑飢又募償營債四千餘金貧戶得全者二百餘舉鄉飲賓

海寧縣志

許楹字季覺海寧人居母喪勺飲不入口者七日父強使

歡粥既葬廬墓三年朝夕哭後居父喪哀毀倍之康熙戊

子歲饑捐賑歷村落計口給票民賴以存

海寧縣志

許日章字崑玉海寧人幼至孝父母疾皆以刲股愈稍長

好施予戚族中不能婚不能舉火者賙恤之嘗見桎梏而

呵號者數百人問之乃欠官租約三千金歸悉捐所有不

足轉貸以輸之買僕知是世家子不責償更贈貲使歸獲

胙篋者素識其人亦贈之貲勸使改過

浙江通志

王冲翰字素修錢塘諸生祖病刲股以進目睫不交者十
旬營地將葬父母或謂葬法宜仲子于君非利弟修王請
別遷冲翰不可曰窆窆以寧先人何論弟利吾利其篤行
不惑類如此

錢塘縣志

吳暉字宜中錢塘人年十二父以貢赴選卒于途暉欲蹈
水以殉母泣諭之中止事母備極孝養比終哀慕不衰事
諸兄以敬叔父喪子暉以己子爲之孫經紀其兩世喪

錢塘縣志

縣志

張璠字魯毓錢塘諸生事繼父克盡子職友于兩弟父卒
遺通鼎鼎兼遇奇荒璠一身肩之不以纖毫累其弟

錢塘縣志

卓榮儒仁和人父隱疾五載醫巫不效刲股亦不效祝天
請代果邁厄疾謂其弟曰夢天許我矣父益壽可五年遂
死死時猶瞠目視曰無令父知我疾革也再聲而瞑

舊志

王起芬字芳人錢塘人兄起彪有德興縣殉難之事起芬
往收其尸歸葬隨之江西號于巡按請卹而巡按難之起
芬洒涕陳說數千言一時聞者稱其賢使署浮梁教諭以
稱職當實授起芬投傳嘆曰羈此爲死者請卹耳豈爲此
縣博士耶康熙二十七年起彪祀鄉賢祠

毛西河集

鄒彪海寧諸生父相嘗病侍湯藥三割股以進父卒事母
周氏孝行益篤母歿哭曰親死吾身俱亡矣泣血期年亦

沒海寧
縣志

韓公務海寧人事母孝冬月必以身溫被溷圍必裹以綿
夏月侍立舉簋俟母熟寐廼已與妻常亭午不得食而奉
母非甘旨不敢進母善飲每夜市醇醪笑歌舞蹈以供母
歡其負販拮据之苦不令母知母亦終其身不知

海寧縣志

程鎮儀字位安昌化人父病嘗糞

昌化縣志

陳向榮字雲來錢塘諸生家甚貧父患肺疾飲不劇則咳
滋甚向榮偶絕炊未嘗不脩甘脆供名釀以奉其父嘗館
于友人方取酒念父卽告歸後就館金陵忽心動遄歸抵
家父故無恙詰旦已溘然逝矣

浙江通志

王修玉字倩修錢塘人父名世明爲鄱陽令修玉性至孝
方成童祖母陳老且疾每夜祝天願減齡益祖母壽忽夢
黃衣人示朱書九十三字後竟符其數父以誣被逮吏卒
環之嚴修玉往視鞭笞交下不爲動父在縲紲凡飲食溲
溺俱修玉手執其勞後卒得釋修玉家貧饔飧不給不廢
吟咏巡撫范承謨嘗語學使云不獨其文可重人尤可師
也性方嚴不可干以非義于人落落難合旣定交久而不
衰學者私謚曰文節先生

錢塘
縣志

胡自省臨安人父病侍湯藥未嘗解帶事繼母尤得歡心

舊
志

俞元雯字天章臨安人父歿哀毀不欲生妻死不再娶與

母同寢食嘗為母親滌廁踰母病兩次刲股得痊

臨安縣志

范文燦字仰雲錢塘人父病刲股友于兄弟三世同爨

錢塘縣志

縣志

潘之洵字漢甫錢塘人事父母先意承志唯諾必謹兄之

浹死邱嫂何哭之哀之洵懼傷父母心跪泣而請何感其

言遂止何十九而寡事之五十餘年不少怠

錢塘縣志

姚廷龍年十三母病禱以身代遂刲股卒

舊志

凌鴻磐字子吉新城人父客于外祖患疾不能輟側藥物

飲食鴻磐哺之三年父為仇人所誣幾陷大辟鴻磐刺血

鳴冤願代父戮司憲鑒其誠覆審得白乾隆三年

旌表

題旌冊

董玉煒餘杭人父天根病目失明玉煒顛天哀禱舐之復明母趙患疽玉煒吮患處得痊年五十子孫滿前而父母穢器必躬自洗滌父母歿悲號慘怛喪葬不遺餘力崇祀

鄉賢

浙江通志

徐德延字解修錢塘人父崙早世奉母孫備極色養居恒

輕貨財排患難里閭推爲祭酒

舊志

張淳字君陳錢塘人少孤養于伯父一讀家後又嗣叔一

賢後淳承色笑伺顏色事之如一母蔣寡淳陳諸有司旌

門淳少不事生產有餘卽散窮乏

錢塘縣志

金世臣仁和人陳夜鄰火延燒世臣負父出烈焰中焦頭

欄額具題

旌表

浙江通志

蔣廷瑞字芝生仁和人母病肝蹶劇禱于神剖肝療之愈

順治庚子飢捐米八十石助賑康熙甲寅閭變贖被掠者

二百人以計脫之者三百餘人

李發枝
撰傳

霍錄科錢塘人康熙五年火及其廬錄科父萬言年八十

餘錄科奔火救父其子文舉奔火救其祖父俱焚死次日

見文舉灰骨猶依祖父膝前

浙江通志

桑天顯字文侯世爲餘姚人天顯徙家錢塘幼喪母父病
翻胃日必熬肉粥以進五年不倦父卒天顯泣血如不欲
生耿逆反有團練拒海賊功例授官不就精岐黃術施醫
子二長調元次鼎元字東愚左三指爪長二尺養性修善

有父風

沈廷芳桑
孝子傳

孫光祚字爰裔仁和監生弱冠隨父客趙代間遭流寇剽
掠父受重傷光祚號泣抱持賊憐之捨去父歿哀毀過禮
母性方嚴小失意光祚與妻長跪以請俟色笑乃起母病
延醫艮山門外醫以除夕不赴光祚往請計路十里許路
傾畝屨齒屢折母愈遂捐金修之成坦途葬母穿墻見舊

穴急封掩改穴以避術家以改處多石爲慮不聽發土果得石石盡則穴在焉人以爲孝義所感

浙江通志

吳文清字元鑑錢塘人父好神仙遠遊不歸文清年十四告母尋父遍歷諸省險阻備嘗在中州物色得之痛哭請歸孝養備至有司屢辟薦以親老力辭及卒里人私謚昭

孝子宏模亦以孝著嘗爲父病刲股

舊志

王一麟錢塘諸生少孤力學母邵哭夫失明一麟舐目復明祖母亡廬墓枯柏復茂康熙十二年奉

旌表

大清一統志

張留侯字赤師仁和諸生父喪三年不赴宴飲不入婦室

禪祭後母令入婦室曰尚有餘哀也好學工文薄遊燕中

歿于邸舍

舊志

嚴曾棠餘杭人侍母寢必睡熟乃退爲母營墓陶甕負土

出入冰雪中指盡裂不少怠竟以勞瘁咯血卒年二十

舊志

傅元宰字君翼侍母病衣不解帶祝天請代兄早亡事寡

嫂如母

舊志

馮光裕錢塘人九歲父卒哀毀如成人母病割股進之遂

瘳

舊志

盧矩字亦馮錢塘人十五遊庠二十登賢書奉寡母周盡

孝養兄楚病曾割股代湯藥兄嫂之喪鬻婦食田殯塋之

錢塘
縣志

章谷字言在錢塘人善畫工八分書母遭奇疾割股以進
立愈每夕誦虞初禪官之說以娛其母嘗客豫章買舟歸
舟中有美人悅而挑之谷整衣冠危坐達旦不爲之亂

錢塘

縣志

孫敞字愷殷錢塘人事嗣父克盡子職衣不解帶形容毀
瘠喪塋盡禮兄彥臣失明問燠寒視起居撫之若嬰兒事
之若嚴父視異母弟如同胞康熙甲寅閩變民被掠者倡
義捐贖路遠不能歸給以資糧人咸義之

浙江
通志

章華錢塘諸生嘗割股療親贖難婦設義塾

錢塘
縣志

吳璠字子璵錢塘人父疾刲股居母喪三年泣血失明甲寅閩變鄰郡子女被掠捐贖者幾千人創悲智社募金以殮無殯者歲率爲常臺使者歷旌其門

錢塘縣志

孫光哲字詰臣仁和人事親能得其歡心居喪毀滅至毫思親如孺子推祖宅讓之昆弟後被火爲之重構嘗贖故人所鬻之子甲寅閩變贖難民數千口

浙江通志

仲大賢大賓大質同母昆季先賢季路裔也幼孤且貧母沈教之成立三人者同心奉母惟謹沈素多病炎夏日青大賓嚙指顙天汲井泉盥之以舌舐之時歲旱井涸大賓跪而挹之則列妹爲母所愛歸于錢而家中落三人者緩

急之大賓入北雍聲噪燕京心動急歸而母沈疾革居母喪鄰家火大賓兄弟扶柩奔向火拜泣聲徹天風忽返火滅大賓兄弟百口同居無異爨

舊志

駱尙志號茂生仁和人十六喪父買布慶春橋以償父債力養其弟妹母病刲股無知之者或見其臂上瘡痕問之不言後仲弟病革復割股療之而愈

舊志

朱常安錢塘人康熙乙卯父病泣禱于神叩頭流血父疾尋愈父又患癰又折右足百計調治家益貧而奉養謁誠終始不倦父歿塋于貴人峰廬墓三月有馴虎之異家忌日必茹齋衣素痛哭三日數十年勿衰具題

旌表

浙江通志

梅守俊守仕昌化人並刲股療父疾

昌化縣志

章棹字仰山昌化人嘗以千金贖難民

昌化縣志

陳鳳起錢塘人母病刲股瘡裂垂斃有司欲上其事鳳起

泣辭邑令遲爓表其門

錢塘縣志

吳琮字魯園錢塘人嘗爲刑部曹出疑獄數十人大司寇

蔚州衛公甚重之性至孝甲寅閩變負母避亂山中遇虎

咆哮而前琮厲聲曰毋驚我母虎遁去

錢塘縣志

盧必陞錢塘人叔父無子以必陞嗣本生父病思食蟪蛄

非其時莫致必陞攜筐採取風潮忽至没于海漁者採之

猶手螭蟻不釋嗣父遇流賊相失必陞躬冒鋒鏑尋父以歸及卒廬墓三年事聞

旌表

大清一統志

黃扉字階晉錢塘學生居母喪三年茹素擁草宿柩側歲時伏臘未嘗一入內閫

舊志

方來字聖祥錢塘人父母性方嚴稍不懌輒長跪以請解顏乃起祖歿力營宅兆廬墓經年嘗葬族中數柩又嘗贖難民數百家惜蚤世

浙江通志

凌鴻磐字子吉新城人家貧讀書事親至孝母病割股救之合邑稱孝

舊志

何應明臨安人事親純孝尙義敦倫

舊志

董光憲字武尊海寧人父維忠孝友多隱德康熙壬午舉鄉飲光憲善承父志友愛無間膳嫁姪女迎養寡姊其子念祖亦孝友性成獨力營先兆建宗祠置墓田捐賑米靡不遵光憲教也光憲年九十遺命以孝友二字爲家法

海寧

縣志

俞昌言字鈞天餘杭人善病不耐繁劇侍父晨昏惟謹五

十猶孺慕不衰

舊志

張楚昭海寧人康熙戊辰火及其廬楚昭父臥病楚昭適他出聞之冒火入重垣解衣裳火抱而出父無傷楚昭體

焦灼閱數月乃愈骨立齒齟人稱火燒頭孝子

海寧州志

俞三得錢塘賣漿者居南壁里家極貧少喪父奉母至孝母愛食鵝炙三得必市以供售炙者習爲常日留以俟三得嘗自念年且老而無後一旦恐宗祀或斬省穡積貲爲弟取婦母卒三得哀毀盡禮亦卒

舊志

朱高治字培宗錢塘歲貢生文公十八世孫性至孝嘗割股以抹父其妻吳氏在室時曾割臂愈父疾至是復與夫同割股以救其舅及夫病革又割臂焉

舊志

何玉梁字韋江號樟亭錢塘人雍正癸卯成進士授庶常甲辰改授編修充丙午順天鄉試同考官所得皆知名士

以母忠風痺陳情終養掌紫陽書院凡九年門下士成進士者先後百餘玉梁生母李廣東新會人年十歲爲山寇所掠賊平爲沁水丞裴贖得之以媵歸玉梁父生玉梁李每思父母玉梁入粵訪得舅氏通音問以順母志甲子夏徽嚴術數州大水棺槨浮江下玉梁傭舟自富春至龜赭之間撈浮棺五千餘募義者接踵又得二百餘編號繪圖俾子姓認歸其不可識者埋之

家傳

傅光遇仁和人康熙乙丑進士榜後適母陸訃至使者遷延投其從父邸覲稍緩一日令無誤館選光遇察得大慟厚責其使者徒跣望星南奔京師見者以爲孝

西河集

何其靖富陽人四歲喪父事母曲意承志宗戚乏者賑恤

之舉飲賓以壽終

富陽縣志

顧伯揆號一齋海寧人少孤貧讀書勵行事繼母王盡色

養事兄恭敬垂老無間一言授從弟田使專力于學親知

不能自存推解無德色子悅履視學山左迎養官署適成

歎命捐俸施賑

浙江通志

羅萬國仁和人弱歲喪父號泣如成人及長事嫡母尤孝

謹母患疽吮之母卒刻木以供朝夕奉事如生事聞

旌表

浙江通志

錢封字軼秦錢塘人年十三執母喪哀毀盡禮里中稱小

孝子父士璋凡三娶封事後母一如所生父歿時封年六

十有一哀號擗踊如嬰兒

錢塘縣志

施瑞麟字儀吉錢塘人爲文精深宏博兒時曾割股以療父疾其後子裕真見其創而問瑞麟語之故裕真曰行孝當如是瑞麟曰修德勵行顯親揚名乃謂之孝今不得已

傷其體膚不足爲孝也

錢塘縣志

吳模字求履錢塘人性至孝割股救親爲諸生有名中年

謝去隱居鐵冶嶺聚書數萬卷嘯咏其中

錢塘縣志

何嘉諫富陽諸生少喪父一慟幾絕及葬卧穴中願以身殉母強之出慟不欲生者數月母卒感慕三載墓傍產芝

草數莖人稱孝感嘗葬族人三世遺骸友人胡紹宗舉家

疫死無所歸悉殯殮之

浙江通志

王法平字斧兩錢塘庠生奉母至孝母病臥三載勤侍湯藥寢不解衣一夕夢神人授以藥方如法服之而愈學使程汝璞資金延聘以母老辭母歿枕苫寢塊日進三溢米身不脫絰時有白鳥止于庭康熙四十三年祀先賢祠

錢塘

縣志

李綱文字友臯錢塘人父疾綱文刺血書疏膝行至吳山禱于城隍歸卽割股父病得痊未幾母病亦祈神割股母

病復愈

錢塘縣志

周鰲字與載錢塘人以忠厚孝弟聞閭里昆弟七人鰲爲

家督慕張公藝風與諸弟友愛終身同爨無間一言

錢塘縣志

汪于高字昭武錢塘人父之萼廬墓得病于高年十一倉
皇獨行自里門達父所凡十數里遇所親欲携之歸必不
可乃偕往侍湯藥惟謹父歿哀毀骨立與兄居再世不分
爨于高素豪于飲兄歿遂終身廢杯勺族母家被火冒烈
焰出之并掖所嘗受業之族人以出于高被熏灼無完膚
病月餘幸得不死鄰鍾某負債將執其妻俱去于高爲償
之鍾請爲于高奴于高曰我拯汝夫婦而復利汝夫婦耶

遣之

仇兆鰲
傳

項鏞正錢塘人諸生有文名因父病禱白岳值風濤覆舟
瀕危猶哀號曰倘父病得生死且不畏及鏞正死其子景
修哀毀骨立勉強治喪畢一慟而絕

舊志

趙啟裕錢塘人十歲喪父哀慟不欲生事母孝謹不離左
右者數年母卒執喪盡禮廬墓三年兄患惡疾近者輒染
啟裕扶侍起居與同寢食兄瘳已亦不染雍正四年

旌表

大清一統志

查繼輔字左辰海寧人父病祈以身代果染父病久而始
愈母病目舐之數月復明弟早歿撫孤姪與已子同

海寧縣志

徐周官字又旦錢塘監生母病劇嘗湯藥侍床蓐不離左

右者月餘及歿哀毀骨立事父能色養花晨月夕邀父老
友聚飲以娛其意終鮮兄弟諸姊于歸傾囊媵之戚友貧
乏者周恤備至族人國課不能償代輸之歲以爲常貧不
能葬及無後者皆爲之維持經紀

錢塘縣志

傅夢熊錢塘人六歲失父母路教之書史輒能記憶八歲
能文家貧棄書習會計母病刲股以進母喪七日不食每
哭泣必嘔血歲時伏臘及忌日祭祀不自知泪之承曉也

錢塘縣志

姚殿岳字鎮公仁和人家貧教授生徒事親孝養備至親
卒葬以禮并葬親族之不能葬者七棺兩次拾遺金候還

失者年三十失偶不再娶

浙江通志

潘學經字明六錢塘人七歲喪母十歲喪父哀毀哭泣若成人初學經未生其父先繼一子父歿遂擢其家貲去人謂學經宜訟之官學經曰如是且大傷吾父母心也吾惟有刻苦自立耳每遇諱日素服承祭竟日不言笑真能有

君子終身之喪者

錢塘縣志

陳季方字元師錢塘人父歿纔弱歲居墓側三年母患疽

吮之而愈

錢塘縣志

凌紹乾字子健錢塘人中康熙己卯副榜爲人嚴氣正性矜惜名節父病籲天願以身代奉母盡孝母歿哀慟骨立

卒隕其身閭里推爲純孝生平博聞強識手註經史性理

諸書崇祀鄉賢祠

鄉賢留祀冊

許嘉賢字心賓富陽人父病刲股父歿廬墓

浙江通志

程文淙海寧人士麟子割股療母病

海寧州志

呂律字翼令仁和在白下聞父喪跣跣就道衝雪兼程

遂廢眠食比歸一慟幾絕勺水不入口者五日杖而強起

書蓼莪詩懸之座側三復流涕家塘棲嘗賦尤平章故宅

詩云潭潭甲第此崔嵬金積豪門限鏡扉寂歷空亭橋下

水數株垂柳暮鴉飛

塘棲志畧

朱之瑞原名燾字鶴群海寧人母亡毀瘠甚隨父世楠肄

業國子監克三館校書時父以州同知需次五日一省輒
節月餐錢奉父無何兩兄至先後得危症伯氏卒歿之成
疾猶強步迎醫治仲不離藥罏者數月已而父病劇糞無
穢氣益惶悸且嗅且嘗禱北斗乞身代旣而父漸瘥仲亦
少間而薰竟不起年二十四

海寧
縣志

顧在高海寧人爲人傭工所入備甘脆養母母疾亟醫藥
不效私刲股以進疾瘳恐人知雖盛暑不解衣有知而詢

之者弗答

海寧
州志

黃永字山甫海寧諸生本姓顧父宏贅於黃永少孤蒙母
姓外氏中落乃賃屋市廛外授生徒內兼井臼忍飢寒而

甘旨無闕年四十餘始娶就館里中母畏雷永聞雷雖夜
必歸母病呻吟永跪庭中自撻其體冀分疾苦遭喪盡哀
躬負土以葬設位於寢出入必告者終其身

海寧
州志

周天裕海寧人母病與弟天德同割股療之母果瘳

海寧
州志

錢氏二孝子海寧人其一小名兔官居羅仲里幼孤日紡
紗以奉母甘醪膏飭不離寢已所食止糠糲母瞽侍左右
無違母偶撻之含笑而受母歿哀毀骨立其一名嵩高母
未食不敢食未寢不敢寢母病夜必潛伺安否病劇與婦
禱於天乞以身代遂先其母卒里中稱兩孝子

海寧
州志

陳殿珍殿玉仁和人以孝友著鄉里構堂宅西爲子姓祠

祀之所族之孤累咸有所收卹爲其嫂呂舒並請

旌表殿珍歿殿玉撫其遺孤延師課之克有成立

靜便齋集及陳氏家譜

周櫟字冀培新城附貢生事父隨至孝母袁病湯藥必親

嘗夜臥牀下衣不解帶者累月友愛無間言置墓田建祠

廟皆引爲己任調恤徧鄉里後以子徹貴贈儒林郎

周氏家傳

俞元祺字貞起錢塘人康熙辛丑進士授編修母老不能

迎養告歸母歿哀毀將免喪猶練冠麻衣晨夕哭不止家

人至不忍聞朔望省母墓得寒疾而卒

積山文集

吳景周字德明富陽人親疾徒步百里外求良醫不避風

雨侍親臥起飲食蚤夕不離由此得瘵疾

吳孝子傳

沈覺斯字予先海寧人居瀕海世業鹽有弟五人經營四方覺斯曰此固爾生計如父何噫我責也遂謝客不出家日落謹身節用色養不衰雍正二年海溢父漂沒覺斯躍入水沈不見客舟見樹下有辨髮露水面以篙出之則覺斯兩手抱父腰而襟繞樹根得不流父子喘息以薑汁灌

之醒

海寧州志

沈煌字升中餘杭諸生父天璋避仇于外音問濶絕煌甫授室長跪請于母曰見不得父弗返矣襖被躡躑獨行人千餘里歷燕趙秦晉作零丁數萬黏通衢及委巷叢祠殆遍卒未有識者已復之燕里寐神祠夢神導之行日瀋陽

卽之其地果值父旅舍奉以歸父故好遊不樂關白家事而煌恒教學會城不忍父若母獨居乃賃居錢塘湖上竭色養十餘年後父母相繼歿躬負土合塋

靜便齋集

汪家珪字問松錢塘人父歿于龍泉柩歸遇洪水幾漂沒家珪誓以身殉呼號援救得免伯兄早世撫其遺孤加于諸子姊寡而貧迎養于家婚嫁其子女業師歿妻子貧乏

月餽廩餼以爲常

道古堂集

成上坤字廣寧仁和人登鄉薦迫于父命一赴禮闈嗣以親老不忍離終身不作仕進想親歿率情合禮過諱日晞

噓欲絕其至性有過人者

雷鉉成上坤傳

張鏞字辛齋仁和人兩兄繼喪姊妹婿亦早世邱嫂寡姊
妹孤甥悉萃居于其家母病刲股以進得少延母歿水勺
不入口者累月居父喪亦如之

吳穎芳
撰傳

溫陳典仁和人母病百藥不效割股和藥以進亦不效陳
典哀毀不欲生氣絕者再扶母柩至窆所大雨雪或以蓋
覆之陳典曰豈有扶柩而張蓋者揮之去竟致寒疾卒年

十八

溫廷鈞弟
陳典傳

鍾允良字天修仁和橫塘人母沈雖祁寒必浴浴必午病
瘥不良于行允良日抱負維謹母喪負土以塋

家傳

查克忠字言思海寧人居親喪哀毀骨立事叔母如母撫

同室弟如同胞戚黨之貧無告者死不克塋者周卹無德色留心經濟嘗笑迂儒專守章句不適時用纂述選舉河

工漕運利弊約舉萬言

敬業堂集

沈建業仁和人喪母田時年幾艾嗚嗚如嬰兒伯兄病篤與其仲刲股肉糜藥以進仲死事寡嫂如母婚嫁其子女

不異所生

道古堂集

倪蘭字畹公錢塘人重瞳子三乳嘗隨大父謁徐宗伯元倬啖以時果懷歸奉其母母顧體廼有身而疾蘭籲以身代疾篤蘭語其兄曰母若不起吾何以生爲顯揚之貴在兄與弟矣母歿蘭自經死年才十有五時炎暑屍越三日

如生

錢塘縣志

張驥仁和人少孤母沈瞽驥舐之禱于神者三年母忽夢

神語曰爾子孝感俾爾眇能視果一目復明

唐劭組淳行錄

邱文煜錢塘諸生嘗還遺金父瞽籲天復明有還睛錄

錢塘

縣志

朱恒孚錢塘人嘗刲臂療父推宅讓兄

錢塘縣志

狄鍾猷字嘉公餘杭人母病刲股尋愈里有麗景塘塘之

上流爲黃公堰溉田千頃堤壞水淤鄉苦旱潦鍾猷倡謀

濬築鄉人德之

餘杭縣志

孫鑰富陽人弱歲父卒擗踊盡哀水漿不入口者累日母

瞽鑰色養久不怠母歿廬墓三年雍正六年題旌

旌冊

章超富陽人父患疽吮之愈母疾籲天求代獲痊雍正六

年題旌

旌冊

吳修齡錢塘人年十四父病籲以身代及歿守苦由如成

人事祖母張盡色養有偷兒夜入室罄所有焚其廬張匿

複壁中修齡冒火負之出毛髮爲焦母鑊臥病奉湯藥衣

不解帶者三年喪葬盡禮雍正八年題旌

旌冊

謝三祝於潛人父病焚香告天願以身代衣不解帶數月

及歿廬墓三年雍正九年題旌

旌冊

姚之棟字金門先世自餘姚遷杭州少靜默嗜讀書補錢

塘諸生家故豐處之泊如及中落乃獨任家事善事母宛轉承歡俾忘其貧祖未葬跋涉嚴寒烈日中卜葬於午朝山其善成先志率類此嗜書老而彌篤遇善本輒手錄爲巾箱書寒夜一燈熒然每至達旦

沈柱臣撰傳

施槃字戴山仁和人早歲棄舉子業隨父瀛赴建陽任佐理政務細大罔缺後遊粵東十三年歸奉母杜門不出天性坦率表裏如一耽玩山水吟咏不輟兄春洲字芳杜友于之樂浹于門內對床白首皆八旬餘槃先卒春洲哭之慟逾月亦卒

施氏家狀

顏蘭字芝侶仁和諸生割產讓兄養寡嫂三十年如一日

錢塘縣志 蘭授室未月餘卽詣父母同寢處夜必數起視安母

止之則曰兒與父母隔終不成寐不如共寢之安母病衣

不解帶者累月及卒哀毀骨立三年不御酒肉服闋猶哀

泣十餘年著有孝經或問箋註行世

公舉事實

方聲宏字蜚卿錢唐人正學之裔弱齡能順承親意父疾

嘗湯藥衣不解帶疾甚禱天求代翦股和藥以進父歿哀

號擗踊幾不欲生未幾遭母喪旣葬廬墓三年雍正十一

年

旌表

浙江通志

楊兆璘字友三錢塘貢生署齡喪母哀慟欲絕父歿執喪

禮三年未嘗見齒事繼母備極孝養兄弟三人同爨終身無間一言族人貧不能祭置祭田有所餘分給焉他若施義棺設義塚賑飢修橋諸義舉亦往往量力爲之

浙江通志

方文華字卓峰新城人甫十歲母潘患弱症湯藥親嘗便溺必躬自澣滌三載母歿哭泣擗踊如成人二弟俱幼厨無粒粟覓螺蛤代之以餉諸弟然後食父館于鄉距家四里許早出夜歸文華必左右扶持初不得于繼母邵文華事之益恭加以箠楚則長跪引慝母亦感悟愛如所生

浙江通志

許曰龍錢唐諸生幼喪母毀如成人父歿飲泣三年平居

敦本睦族任恤親黨嘗集里人示以孝悌忠信之義遇忿
爭搆訟者委曲化導令人自愧而止葬親西溪有方氏遠
支塚在墓域曰瓏仍之春秋祀畢爲之焚紙錢厚德尚義

類此

浙江
通志

沈棄疾字又辛海寧諸生母患弱症祝以身代母歿哀毀
備至兩弟穉齡屬婦金撫之成立仲弟裕早夭遺孤六歲
飲食衣服必與子均年三十始析居叔父去非誣陷入獄
而病其子患痢不能入侍乃代之往往則力訴憲司得保
釋歸歿于家後其子無力舉殯出金助之嘗買族人采臣
田采臣歿其妻張立節撫孤遂焚券而完其田

浙江
通志

王國祥字熊符錢唐人喪父幾毀滅奉母曲盡孝道兄歿事嫂如母嫁其女資踰于已出弟三人衣食之婚之誨之姊寡奉以粟帛以女妻其子

錢塘縣志

何章雲錢唐諸生母疾扶抱不頃刻離及歿絕粒十餘日父患泄痕半載章雲日夜偃榻前手遺矢出之父歿葬九曜山朔望必詣墓擗踊二十年如一日與弟友愛撫孤姪

教養兼至

浙江通志

周麟字渭濱錢唐人年十五母得奇疾三月不卧目爲之青入山遇老翁授以草藥始愈歲饑經畫賑濟推解親族

甚衆

浙江通志

姚際晉字錫蕃其先自休寧徙錢唐母疾刲股父喪哀毀
骨立讓產于諸兄諸兄中落爲兄子婚天者葬之性好施
凡成梁治途皆縮衣食爲之而不喜近名施藥則托之醫
者某施祭則托之市人某借道寺施粥水則托之隣居某
某居鄉謙抑年八十猶徒步出入云

浙江
通志

葉正榮字仁則錢唐人父有心疾衣不解帶藥必親嘗者
數載居母喪年已五旬能致哀毀兄弟五人共爨正榮秉
家政無所私四弟早逝撫孤姪如已子里黨親族間周恤
無倦嘗客開陽錢吉甫負債鬻子代償以止之故人朱龍
若年老無嗣買婢贈之龍若亡撫其遺孤成立

浙江
通志

汪之麟字天石先世自歙遷錢塘之麟九歲而孤母哭父
目爲膜跪而舐之且漱且吮不數日如初後病痢醫謝不
可爲之麟仰天椎心籲以身代與婦唐取中裙廁踰爲浣
滌匝月病少差嘗販人不贍小大必應應必稱母命母歿
之麟年五十餘猶若孺子慕者乾隆元年奉

旌表

冊題旌

朱文鎰字殿揚號逸菴仁和人本姓金工詩父客死河南
文鎰幼無所依鞠育于朱氏旣壯往尋父骸于朱仙鎮年
遠且被水樞湮土中無所得文鎰匍匐哀號禱于神有術
者能圖光現示埋樞形勢彷彿跡得其處掘地得骨滴血

竟驗負之歸

竊餘集稿

莫美章錢塘人事父母飲食衣服問視惟謹疾則奉湯藥積夜不寐父母相繼歿哀毀三年如禮嗣是遇諱日及歲時伏臘必之墓所泣拜如新喪乾隆元年

旌表

題旌冊

鮑光朗仁和人年四歲父死哭絕而甦曾祖母祖母皆寡母年二十相與携持光朗不使一日見風日而光朗爲曾祖母延醫走八十里外足爲之裂時年才十四母以節奉旌光朗徒步涉之江採烏鰂山石巋然建節孝坊于其母之墓人謂有光朗之孝而其母之節孝以顯也乾隆元年

旌表

冊題旌

施嘉穀錢塘人九歲時父客于外祖母柩在堂鄰不戒于火倉猝不能移避嘉穀拜火號泣誓以身殉俄頃風反火滅父病疫不解帶者數月父歿率情盡禮廬墓三年奉母孝母病目嘉穀夜半禱天含藥跪舐乃復明乾隆三年

旌表

冊題旌

田世容錢塘人母患痼疾藥百試不效醫者謂唯天目山海風藤萬一可療然率在虎狼窟中不可得世容毅然往竟得藥歸以進之果瘥父母相繼歿結廬墓側有妹婺居子死世容典衣殯葬割屋之半與妹居而養之終身乾隆

三年

旌表

冊題旌

顧棟生仁和人父謫戍棟生隨行父以奉祖母命之乃號泣歸侍事之維謹祖母既塋徒步奔父戍所數年康熙丙子奉

恩例得捐馬贖罪棟生呈請代父從軍至絕塞三十六臺黑魯淪効力得贖父還父以壽終廬墓三年喪畢嘔血數升而死乾隆四年

旌表

冊題旌

徐秉仁富陽人母病竭力侍奉及歿哀不欲生既塋欲廬

墓以父病不能離晨一往焉父卒廬墓三年畢復居三年以遂母喪初志乾隆四年

旌表

題旌冊

章晁字林伯昌化人母病剗股以進病隨起母命析薪傷股創血流染裾或問之晁佯曰柴刀誤傷指爾

昌化縣志

王彥華昌化人有族叔無賴子也毆彥華母隣里左袒互毆彥華往捄族叔已傷重死竟以故殺訟官坐抵繫獄太守李以暑月清囚見彥華臂二瘡痕詰之乃知其嘗剗股

療父母病力爲申雪得釋歸

昌化縣志

吳琦文字玉章海寧人父病徒步延醫數百里外足裂流

血母目盲舐之復明居父喪廬墓三年爲人刻厲以誠一念之妄輒自榜曰何以對吾親乾隆六年

旌表

海寧縣志

鮑增仁和人父病衣不解帶者三月焚香祝天請代父歿泣如孺子述父行一編曰永思錄弟妹俱幼教育成人次第有家室母終一慟而卒乾隆十三年

旌表

題旌冊

胡謙富陽人七歲喪母哀泣如成人父病延醫至湯家渡大風覆舟若有掖之登岸者遂免父歿結廬墓側事繼母曲盡孝道多義舉見喪不能殮貧不能娶者資之乾隆十

三年

旌表

題旌
冊

孫人偉字雲士仁和人年五歲喪母丁哀泣如成人稍長
與其弟珠篤力于學熟習儒先語錄父恒善病乃棄舉子
業經紀家事父病甚煉瓊玉膏守爐七日夜露禱于神以
身代額隆起如瘤剗左股肉以進父已不能飲既殯塋廬
墓三年墓距家十餘里晨必至家一省繼母程弟珠病怯
爲之治參藥中夜無睡珠舉于鄉而泣恨親不及見也人
偉則喜動顏色拊其背勉以顯揚之說人兩賢之年六十
二卒乾隆三十八年

旌表

題旌冊

許貴元昌化人年八歲割左股療父病年十六母病割右

股

昌化縣志

姚德松字蒼巖仁和人嗣世父默菴後事之如本生父默

菴病刲股以進弗瘳顙天以身代及歿毀瘠不能起年三

十婦黃歿守鰥四十年姻朋有急請無弗應家有井泉甘

公之爲義井

家傳

汪沆字西沆錢塘人性友愛家產素豐皆爲弟破散沆不

以介意弟有逋負沆皆代償之

武林耆舊續集

黃仁禮字以存錢塘人幼孤家失火仁禮奉母棲居火熾

梯折負母越窻母體肥瘠狹不得出仁禮慟哭抱母殉之

其妹在旁亦以不忍去焚死巡撫表其門

黃氏家傳

黃樹穀字松石仁和人博綜經籍工行楷篆隸父客死保

定匍匐號泣渡河時大水河防決跣涉泥淖足盡瘡血流

沙礫既至瘞所水已嚙棺乃函骨背負以行冒雨杖竹忍

飢寒行霑潦中凡七日始得舟幾無人形張墨岑爲寫涉

水負骸圖王吏部題爲今之虞趙

城北雜記

盧金聲字浩亭仁和人幼喪父事母曲盡其意色養怡怡

出入必告母病不解帶者數十晝夜撫兄遺孤爲之娶婦

仲叔二兄悉迎養同居一生嚮嚮篤實云

道古堂集

陳兆嶠字閭風錢塘人雍正己酉舉人與兄兆崙並以詩文著聲遠近性篤摯侍其親依依若孺子遇初度日念母輒淚涔涔下官內閣中書丁母憂以親未葬遂決志不出弟兆岐字支山以兄官京師獨任家事父病痢醫者言紫黑色不可治兆岐晝夜奉侍手掇口嘗越三日痢黃而味苦病乃瘳後父柩在殯鄰家火風逼中寢兆岐呼號誓與柩俱燬俄反風火遷旁舍得免居母喪以毀卒

行畧

張果字誠然錢塘人乾隆辛酉舉人家貧資館穀事親至孝父歿泣盡繼以血事後母至九十餘備營甘旨歸省輒朝夕不離性抗直能面折人過富家招致之其子弟不可

教徑辭去雖厚幣不顧也然遠近感其誠禮幣不絕推大
功同財之義待羣從兄弟恩義倍至旁及戚黨前後共葬
百餘棺客京師有少時受業師歿於旅舍果親視含殮奉
其棺數千里歸葬臨窆乃去道路之費封樹之資畚揭埋
坎之用未嘗假助於人其它事類此

公舉事實

金肇鐸字自白錢塘人性孝友客遊紹興數日必使人問
親起居狀若在左右得佳果慮親未食正席不敢嘗方親
迎而母疾躬奉湯藥不入內室衣不解帶者累月與從兄
弟同居無間言好施予歲飢屢出穀賑濟先世居休寧年
遠失其墓肇鐸篤志訪求遂得累世邱隴於富瑯邨封築

如禮復建家祠於杭城嘗以府志久而不修欲捐貲重刻後其子泳承父志續修府志其經費獨任之

公舉事實

許承堯字仲昭錢塘縣學生承基弟事兄甚謹以母疾刲股成疾其妻吳氏又以夫病刲股不效沒後二十餘年兄承基思念不置乃繪已及弟像曰連枝圖并錄題贈之言

刊刻成集

許氏家傳

王茂麟仁和人家極貧不識字運水爲生食不飽片肉奉母母死不能葬宿柩之側十五年每時節及諱日拜柩前號慟震鄰里見人有母輒悲感流涕

蔣師荻撰傳

董錫圭字禹欽海寧人幼居父喪哀毀若成人母遭危疾

禱以身代額血如水注月餘母歿坐臥草土號泣無時人

不復識是錫圭容矣竟以毀卒

海寧州志

周蓮字予同海寧人家多藏書偕其弟春自爲師友乾隆乙酉領鄉薦父中風危篤額天請代及卒慟絕復甦毀瘠

特甚母疾衣不解帶目不交睫旬日鬚鬢頓白

行狀

董爾選昌化諸生性醇篤母痼疾刲肉進之愈乾隆壬申

丙子歲歉罄所有米穀以濟鄉里

昌化縣志

洪澣字巨川新城國子生天性孝友幼時隨父日昌寓居

蘇州朝夕侍養囊無私蓄而性好施予嘗獨力創造家廟

鄉黨賴其周卹者稱德勿衰以子樞貴贈奉直大夫

洪氏家傳

陳兆鏞仁和人父雲蛟爲農田不過十畝兆鏞飲食衣服
修脯藉其族父孝公一一支給之嘗食于孝公有甘者輒
不食乞歸奉其母年十二歿

靜便齋集

杭州府志卷九十一終